



## Aningaasanut Nunanullu Allanut Naalakkersuisoq

**Aningaasaqarnermut Ataatsimiititaliap suliaq nr. 01.31.06/07-00278 pillugu ulloq 12. oktober 2007-imi aalajangiinera pillugu Naalakkersuisunut ilisimatitsineq.**  
(Naalakkersuisut ulloq 1. oktober 2007-imi aalajangiineranni imm. 2b)

### Ittoqqortoormiini oqaluffiup iluarsaannissaata pilersaarusionerqarnissaa

Naalakkersuisut **inassutigaaat**,

- kontomi pingaarnermi 84.45.01-imi, Ilaginni nutaanik sanaartornermut tunngasumi, aningaasaliissutit suliassamut nr. 190.58.041-mut, Ittoqqortoormiini oqaluffiup nutarterneranut tunngasumut, 500.000 koruuninik amerlineqassasut.
- kontomi pingaarnermi 80.00.01-imi, Nuussinissanut sillimmatinut tunngasumi, aningaasaliissutit 500.000 koruuninik ikilineqassasut.

### **Aningaasaqarnermut Ataatsimiititaliap oqaaseqaatai**

Ittoqqortoormiini oqaluffiup iluarsaannissaanut ½ mio. kr.-it Naalakkersuisut suliami matumani qinnutigaaat.

Naalakkersuisut Napasumi oqaluffik (Aningaasaqarnermut Ataatsimiititaliap suliaa 07-275) pillugu 8. oktober 2007-imi akissuteqaataat suliamik suliarinninnermini ataatsimiititaliap tunngavigaa, tassanimi apeqqutinik tunngaviusunik ataatsimiititaliap Naalakkersuisunut nassiussimmat.

Tamanna tunngavigalugu Naalakkersuisut akissuteqaataanni makku ataatsimiititaliamit erseqqissaatigineqassapput:

1. Napasumi oqaluffik pillugu apeqqutit nr. 4 aamma nr. 9 Naalakkersuisut akinnngitsuuissimagaat Aningaasaqarnermut Ataatsimiititaliap paasivaa. Apeqqutit taakku akineqarnissaat qinnutigineqarpoq.
2. Aalajangiinermi matumani oqaluffiit taaneqartut saniatigut oqaluffinnik allanik iluarsartariaqarluinnartunik aningaasalersorneqarnissamillu pisariaqartitsisunik peqanngitsoq Naalakkersuisut qulakkeerpaat.
3. Ilagiit illuutaat aserfallatsaaliinikkut iluarsaanikkullu kinguaattoorfiusut 2010-mi tamakkerlutik angumerineqarnissaannut 2008-mi aningaasanut inatsisissatut siunnersuummi aningaasaliissutit aqqutigalugit naammattumik aningaasassaqartinneqassasut Naalakkersuisut naatsorsuutigaat. Tamanna iluarisimaarlugu ataatsimiititaliap tusaatissatut tiguaa.
4. Oqaluffiit sorliit allanngutsaaliugassaanersut pillugit ilisimasanik aaqqissuussaasumik Naalakkersuisut peqanngitsut. Tamanna ajuusaarnartutut isigineqartariaqarpoq.
5. Qinnuteqaat matumani pineqartoq aqqutigalugu Naalakkersuisut 500.000 kr.-it qinnutigaaat, tamatumali peqatigisaanik allallutik 31. december 2007-imi 350.000 kr.-iinnaat atorineqarsimassasut. Paasissutissaq taanna **naammaginangitsutut** Aningaasaqarnermut Ataatsimiititaliamit isigineqarpoq! Tassunga atatillugu ataatsimiititaliaq 2007-imi aningaasanut inatsisissatut siunnersuutip aappassaaneerqarneranut isumaliutissiissummini **kaammattuut** una aammaarluni

kaammattuutigimmagu  
eqqaasitsissutigineqassaaq:

Aningaasaqarnermut

Ataatsimiititaliamit

**”Kaammattuut nr. 7**

Aningaasat Sanaartugassanut Iluarsagassanullu Aningaasaateqarfimmi atorneqaratik uningaannartussaasut ilisimagaluarlugu aningaasanik qinnuteqartoqartaqqunagu sanaartugassanut aningaasaliissutinik atuinissamik piviusorsioartumik missingersuusiortarnissamik qulakkeerinninniarnerminnik Naalakkersuisut ingerlatsiinnarnissaat Aningaasaqarnermut Ataatsimiititaliamit **kaammattuutigineqarpoq.**”

Missingersuutitigut 150.000 kr.-inik toqqorterineq aningaasanut inatsimmut sanilliullugu annikitsuinnaasutut oqaatigineqarsinnaagaluarpoq, sanaartugassatulli aningaasaliissutinik atuinissap piviusorsioartumik missingersuusiortarnissaanik Sanaartornermut Iluarsaanermullu Aningaasaateqarfimmi tunngaviulluinnartoq Naalakkersuisut allattoqarfiata **suli (!)** paasisimangikkaa suliakkut tassuunakkut ersarilluinnartumik ersersinneqarpoq!!!

Ilagiinnut tunngasuni iluarsaassassanut pingaarnertut pilersaarut 2008-p ingerlanerani aatsaat suliarineqarsinnaasoq Aningaasaqarnermut Ataatsimiititaliami amerlanerussuteqartut, Siumut, Inuit Ataqtigiit Atassutillu paasivaat. Ittoqqortoormiinili suliassa q ima nukinginnartigisutut isigineqartariaqarpoq suliap tamatuma naammassineqarnissaanut utaqqinneqarsinnaanani. Tamanna tunngavigalugu qinnuteqaat ataatsimiititaliami amerlanerussuteqartunit akuersissutigineqarsinnaavoq.

Aningaasaqarnermut Ataatsimiititaliami ikinnerussuteqartup, Demokraatit ilaasortaaitaata inassuteqaatit akuersissutigisinnaanngilai. Suliassa qarfimmut aningaasanik amerlanerusunik immikkoortitsisoqartinnagu suliassa qarfimmut pingaarnertut pilersaarusiap utaqqineqarnissaa ikinnerussuteqartup kissaatigaa. Ittoqqortoormiini oqaluffiup iluarsaanneqarnissaa pisariaqartoq ikinnerussuteqartup akuersaarpa, suliassa qarfimmulli pilersaaruteqannginnikkut pingaarnertut tulleriiaarineq avaqqullugu tassanngaannartumik iluarsaattariallit amerlanerit saqqummertarnissaat aarleqqutigineqarsinnaavoq.

**Aningaasaqarnermut Ataatsimiititaliap aalajangiinera**

Siuliani imm. 1-imit 5-imut allassimasut naapertorlugit ataatsimiititaliap apeqqutaanut akissummik tamakkiisumik kukkunerisukkamillu Naalakkersuisut nassiussinissaat **tunngavissaatillugu** Naalakkersuisut inassuteqaataat Ataatsimiititaliami amerlanerussuteqartunit **akuersissutigineqarput**. Ullumimit ullut suliffiit arfineq marluk iluanni Naalakkersuisut akissuteqaataat kalaallisut danskisullu tiguneqassasoq aammalu qarasaasiakkut nuutinnera uunga nassiunneqassasoq naatsorsuutigineqarpoq: [nch@gh.gl](mailto:nch@gh.gl).

Inussiarnersumik inuulluaqqusillunga

Ruth Heilmann

Aningaasaqarnermut Ataatsimiititaliap siulittaasorigallagaa